

In d' Luur

## Ik hebb docht, dat maakt nu luud Ping

Van Karin Böhmer



Word ja faker maal seggt, dat de Oostfrees en langen Leitung hett. Dat stimmt ok un daar sall sük nix an ännern. Man bold sall he butendeem noch en breiden Leitung krieggen. In ruugweg een Maand will de Landkreis mit dat Grootprojekt „Breitbandausbau“ losleggen. Wenn nett kien Sneei liggt. Anners mutten wi noch eevkes wachten. Gifft bold nix, waar so ungedüurig up wacht word as up dat fixe Internet. Man is dat in Oostfreesland würelk so nödig, as d'r alltied seggt word? As dat in't vergangen Jahr losgung mit School in Huus, Video-Versammeln un Sluren-Büro doch ik eerst, dat maakt nu luut „Ping“ un denn is dat oll klatterg Kabel för ewig Tieden utnannerflogen. Man dat is nich passeert. Grote Firms maken all, wat mutt, över't Internet. De Mesters seggen, dat meest nich de Leitung dat Probleem bi't Lehren is, man de Reedskupp in Huus. Internet hebben de meesten, man kien Drucker un al gaar kien Druckerfarv. Un ik hebb van twee of drie Lüü sogaar al höört, dat se Netflix of anners'n Videokanaal kieken. Schient woll en Spier Leitung daar to wesen, wenn't um wat geiht. Man dat kunn natüürelk noch völ beter. Un denn können wi bold völ gauer lehren, völ flinker arbeiden un völ fixer konsumeeren. Wenn wi denn man nich fix anscheten sünd.